

Mashahidi wa Kristo Kama Masihi



SABATO MCHANA:

Soma la Juma Hili: *Yohana 1:19-23; Isaya 40:1-5; Yohana 1:29 – 37; Rum. 5:6; Yohana 1:35 – 39; Yohana 1:43 – 51; Yohana 3:1-21.*

Fungu la Kukariri: “Yesu akajibu, akamwambia, Amin, amin, nakuambia, Mtu asipozaliwa mara ya pili, hawezi kuuona ufalme wa Mungu” (*Yohana 3:3*).

Hapana shaka, Yesu aliwapa watu ushahidi madhubuti wa kimaandiko kuunga mkono madai ambayo Alikuwa akiyatoa kumhusu Yeye Mwenyewe, ikiwemo, “Amini, amini, nawaambia, yeye aminiye yuna uzima wa milele” (*Yohana 6:47*).

Lakini kuna zaidi ya hilo: kugeuza maji kuwa divai; kulisha maelfu kwa mikate michache; kumponya mwana wa mkuu; kumponya mtu kwenye bwawa la Bethzatha; kumpa kuona aliyekuwa kipofu tangu kuzaliwa; kumfufua Lazaro kutoka kwa wafu. Mwinjilisti anaonesha aina mbalimbali za matukio, na watu—Myahudi, Mmataifa, tajiri, maskini, mwanamume, mwanamke, watawala, watu wa kawaida, wenye elimu na wasio na elimu—kushuhudia juu ya Yesu ni nani.

Yohana anaelekeza hata kwa ushuhuda wa Baba Mwenyewe, na kwa Maandiko, yote yakitoa ushahidi wa utambulisho wa Yesu.

Juma hili linaanza na ushuhuda mzito wa Yohana Mbatizaji. Mashahidi wengine wanakuja jukwaani pia: Andrea na Simoni Petro, Filipo na Nathanaeli na shahidi asiyetarajiwa kabisa, yule Farisayo Nikodemo. Lakini shahidi mwingine anasimama nyuma kwenye vivuli (huyo mwanafunzi mwingine pamoja na Andrea, katika *Yohana 1:35, 40*)—Yohana mwenyewe.

*Soma somo la juma hili ukijiandaa kwa ajili ya Sabato, Oktoba 26.

Ushuhuda wa Yohana Mbatizaji

Kama somo la juma lililopita lilivyoonesha, Injili ya Yohana ilivyoanza na Yesu Kristo, Neno, katika kuwepo Kwake milele kabla ya Uumbaji. Lakini katika utangulizi huo huo, Yohana Mbatizaji anaonaekana kama shahidi wa Bwana Yesu. Baadhi ya Wayahudi nyakati za Yesu walitarajia masihi wawili, mmoja wa kikuhani na mwingine wa kifalme. Yohana anafundisha wazi kabisa kwamba Yohana Mbatizaji hakudai kuwa mmoja wa masihi hao, lakini, alikuwa shahidi wa Masihi mmoja wa kweli.

Soma *Yohana 1:19 – 23. Yohana Mbatizaji aliielezeaje huduma yake na utume wake?*

Viongozi wa kidini waliwatuma makuhani na Walawi kumwuliza Yohana kama alikuwa nani. Kulingana na jinsi matarajio ya Masihi yalivyokuwa juu katika Yudea, ilikuwa muhimu kwa Yohana Mbatizaji kuweka wazi uhusiano wake na matarajio hayo. Yeye hakuwa ile Nuru, lakini alikuwa ametumwa na Mungu kubeba ushuhuda kwa ajili ya ile Nuru na kufanya maandalizi kwa ajili ya ujio wa Masihi (*Yohana 1:6-8*). Hiyo ndiyo sababu akawajibu kwa uwazi kama alivyoweza, akisema: “Mimi siye Kristo” (*Yohana 1:20*).

Vilevile, Yohana alibatiza kwa maji, bali Kristo angebatiza kwa Roho (*Yohana 1:26, 33*). Yohana hakustahili kulegeza gidamu za viatu vya Yesu (*Yohana 1:27*). Kristo alikuwa bora kuliko Yohana kwani alikuwepo kabla ya Yohana (*Yohana 1:30*). Yesu alikuwa Mwana wa Mungu, na Yohana aliwaelekeza tu watu Kwake (*Yohana 1:34*).

Soma *Isaya 40:1-5 na Yohana 1:23. Yohana anatumiaje aya hizi?*

Katika siku za njia za vumbi – tope na zilizokuwa na mawe, nyakati fulani watumishi walitumwa kumtangulia mfalme kwa ajili ya kusawazisha maeneo ya njia au barabara na hivyo pia kuondoa kona kali ili kunyoosha njia ya mfalme. Hivyo, katika utimilifu wa unabii, Yohana alikuja ili aandae mioyo ya watu kwa ajili ya Yesu.

Ni kwa njia zipi, inatupasa kama sisi Waadventista wa Sabato, kufanya namna iyo hiyo ya huduma kama alivyofanya Yohana Mbatizaji? Ni mambo yapi yanayofanana katika miktadha hiyo miwili?

Mwana - Kondoo wa Mungu

Taifala Kiebrania lilikuwa likimtafuta Masihi ambaye angewakomboa kutoka kwa Warumi. Lengo la Injili ya Yohana lilikuwa kubadilisha uelewa wao wa Masihi ili wapate kutambua katika Yesu utimilifu wa unabii unaochusu ujio wa Mfalme. Masihi asingekuwa mtawala wa kidunia. Alikuwa kutimiliza ahadi zote za Agano la Kale kumhusu Yeye Mwenyewe, ambazo zinahusisha kafara Yake binafsi kwa niaba ya ulimwengu na kufanya upya uhusiano kati ya Mungu na watu Wake.

Soma Yohana 1:29-37. Ni tangazo gani analofanya Yohana Mbatizaji kumhusu Bwana Yesu? Anatumia mfano gani kumwonesha, na kwa nini ina umuhimu hivyo katika kuelewa Yesu alikuwa nani na utume Wake ungekuwa nini?

Kauli ya Mbatizaji kuhusu Yesu kama Mwana-Kondoo wa Mungu inathibitisha kusudi la Injili ya Yohana, ambayo ni kuleta upya ufahamu wa kazi na jinsi alivyo Masihi. Yesu angeweza, hakika, kuwa utimilifu wa ahadi ya mfumo wa dhabihu, uliorudi nyuma hadi kwenye ahadi ya Mkombozi iliyotolewa kwanza katika *Mwanzo 3:15*.

"Wakati wa ubatizo wa Yesu, Yohana alimwelezea kama Mwana-Kondoo wa Mungu, nuru mpya ilikuwa imeangazwa katika kazi ya Masihi. Mawazo ya Nabii yaliongozwa kwenye fungu la *Isaya 53:7* lisemalo: 'Kama Mwana-kondoo apelekwaye machinjoni.'" - Ellen G. White, *Tumaini la Vizazi Vyote*, uk. 114.

Soma Marko 10:45, Warumi 5:6, na 1 Petro 2:24. Aya hizi zinatusaidiaje kuelewa jukumu la Yesu kama "Mwana-Kondoo wa Mungu"?

Haidhuru Yohana Mbatizaji alihitaji kujua zaidi kiasi gani juu ya huduma ya Yesu, alikuwa na hakika kwamba Yesu alikuwa Masihi aliyehidiwa, Yeye aliyekuja katika kutimiliza unabii.

Hebu tafakari kwa kina zaidi cheo cha Yesu kama "Mwana-Kondoo wa Mungu." Je, kinaleta taswira gani akilini, na ni kwa jinsi gani muunganiko Wake na mfumo wa kafara za Agano la Kale unakusaidia kuthamini gharama kubwa ya wokovu wetu?

Wanafunzi wawili wa Yohana

Wanafunzi wawili wa Yohana Mbatizaji walikuwa wamesimama pamoja Naye wakati Yesu alipopita pale. Yohana akasema, “Tazama Mwana-Kondoo wa Mungu!” (Yohana 1:36). Wale wanafunzi wawili walikuwa wamesikiliza ujumbe wa Yohana kuhusu Yesu Kristo, ambaye angetimiza unabii wa Agano la Kale kuhusu Masihi ajaye. Wanafunzi wale wakamwacha Yohana Mbatizaji ili wamfuate Yesu, wakitambua kwamba Yesu alikuwa mkuu kuliko Yohana Mbatizaji na kwamba alikuwa Ndiye utimilifu wa ujumbe wa Yohana.

Soma Yohana 1:35-39. **Hawa wanafunzi wawili walifanya nini baada ya kusikia ushuhuda wa Yohana kumhusu Bwana Yesu?**

Wakiwa na shauku ya kuwa pamoja na Yesu, hawa wawili walitumia siku nzima pamoja Naye. Nani ajuaye mambo ya kushangaza waliyojifunza na kupata uzoefu Wake!

Lazima yalikuwa mambo ya ajabu, kwa sababu, muda sio mrefu, ilikuwa ni shauku yao kushiriki uzoefu wao na wengine. Mara ile, Andrea, mmoja wa wanafunzi hao wawili, akamkuta nduguye, Simoni kisha akamwambia, “Tumemwona Masihi (maana yake, Kristo)” (Yohana 1:41). Wakati Andrea alipomleta nduguye kwa Bwana Yesu, mara ile Bwana Yesu alionesha kwamba alikuwa anamfahamu, akisema, “Wewe u Simoni, mwana wa Yohana; nawe utaitwa Kefa” (Yohana 1:42). Yesu alimjua na kumwelewa Petro. Kwamba Bwana Yesu anamjua mtu ndilo wazo kuu linalorudiwa rudiwa katika Injili ya Yohana. (Kwa mfano, tazama Yohana 2:24, 25).

“Kama Yohana na Andrea wanalikuwa na mioyo isiyoamini, kama walivyokuwa makuhani na wakuu, wasingekuwa wameketi kama wanafunzi miguuni pa Yesu. Wangekuja kama wakosoaji, ili kuhukumu maneno Yake... Lakini wanafunzi hawa wa kwanza hawakufanya hivyo. Waliitikia mwito wa Roho kwa njia ya mahubiri ya Yohana Mbatizaji. Sasa walimfahamu Mwalimu wa mbinguni.... Nuru ya mbinguni ilianguka katika Agano la Kale na kuwaelimisha maneno Yake. Ukweli ukadhihirika nuruni.” – Ellen G. White, *Tumaini la Vizazi Vyote*, uk. 117.

Msisitizo wote wa Injili ya Yohana ni kuwaelewesha wote kuwa Yesu ni nani, ili habari hii njema ipate kushirikishwa na dunia yote.

Ni kwa njia gani Kristo, na imani yako katika Kristo, vimebadilisha maisha yako? Ni mabadiliko gani ambayo bado ungependa kuyaona yakitokea?

Filipo na Nathanaeli

Soma Yohana 1:43-46. Ujumbe wa Filipo ulidhihirisha nini juu ya imani ambayo tayari alikuwa nayo katika Yesu?

Fiilipo alikuwa akitokea Bethsaida kama Andrea na Petro. Akamwona rafiki yake, aitwaye Nathanaeli, na kumwambia kuhusu Bwana Yesu. Yohana Mbatizaji alikuwa amemwita Yesu kuwa ni "Mwana-Kondoo wa Mungu." Andrea alikuwa amemwambia Petro ya kwamba alikuwa amemwona "Masihi." Lakini Filipo anamwita Yesu kuwa ndiye Musa na manabii waliyeandika habari Zake na kisha akaongeza jina "Yesu wa Nazareti." Rejea yake kwa Nazareti inaibua mwitiko mkali kutoka kwa rafiki yake.

Nathanaeli alionekana kuwa na mtazamo hasi dhidi ya mji mdogo wa Nazareti. Kwa vyovyote mfalme asingetokea kwenye mji uliokuwa pembeni vile. Ni rahisi kwa mtazamo hasi kufunga macho yasiwaone watu katika thamani yao hasa. Filipo anaonekana kutambua, yawezekana kutokana na mazungumzo ya nyuma na Nathanaeli, kwamba namna iliyo bora ya kushughulikia mtazamo hasi sio hoja za kifalsafa au za kiteolojia bali kumkaribisha mtu kupata uzoefu wa ile kweli yeye mwenyewe binafsi. Yeye akasema tu, "Njoo uone." Na hicho ndicho hasa alichofanya Nathanaeli. Alikwenda akaona.

Soma Yohana 1:47 - 51. Je, Bwana Yesu alimshawishije Nathanaeli kwamba Yeye ni nani, na jibu la Nathanaeli lilikuwaje?

Kinachokosekana kati ya mstari wa 46 na mstari wa 47 ni maelezo muhimu ya jinsi Nathanaeli alivyoitikia mwaliko wa Filipo. Hata hivyo, aliinuka na kwenda kuona. Urafiki wake na Filipo ulikuwa na nguvu zaidi kuliko mtazamo wake hasi, na maisha yake yalikuwa yanakwenda kubadilishwa kuanzia wakati huo na kuendelea.

Yesu anasema maneno mazuri kuhusu Nathanaeli, akimwita Mwisraeli kweli kweli, asiye na hila ndani yake (Yohana 1:47), tofauti kubwa na kile Nathanaeli alichokuwa amesema kuhusu Yesu (Yohana 1:46). Nathanaeli anajibu kwa mshangao kwa sababu hakuwa amekutana na Yesu kabla ya hapo.

Kisha Yesu ananena juu ya kumwona Nathanaeli akiwa chini ya mtini, na kauli hiyo ndogo inamsadikisha Nathanaeli. Bwana Yesu, kwa uwezo wake kama Mungu, alikuwa amemwona Nathanaeli akiomba, akiutafuta ukweli akiwa chini ya mti huo (tazama Ellen G. White, *Tumaini la Vizazi Vyote*, uk. 140, 141). Kisha Nathanaeli anafanya maungamo yaliyotukuka, akimwita Yesu, Rabi, Mwana wa Mungu na Mfalme wa Israeli. Ona jinsi ufunuo huu unaoonekana kuwa mdogo unavyosababisha ungamo kuu la imani.

Ushuhuda wa Nikodemo

Soma Yohana 3:1-21. Ushuhuda wa Nikodemo unaungaje mkono mada ya Yohana ya Injili ?

Nikodemo alikuwa mwalimu aliyeheshimiwa katika Israeli na mshiriki tajiri wa Sanhedrin. Ushuhuda wake unakuwa sehemu muhimu katika Injili ya Yohana kwa sababu kadhaa. Alimtaja Bwana Yesu kama "Rabi" naye akaonesha ishara ambazo Yesu alizitenda kama uthibitisho wa utume Wake wa kiungu. Kwa hiyo, hata kabla Nikodemo hajatambua kile alichokuwa akikifanya, alikuwa akitoa uthibitisho uliounga mkono U- Masihi wa Bwana Yesu.

Nikodemo aliziangalia ishara zenyewe kama ushahidi wa wito wa kiungu wa Bwana Yesu lakini hakuziona kama zilizoelekeza kwa Yesu kama utimilifu wa unabii wa Agano la Kale kuhusu Masihi. Hivyo, Nikodemo alikuja akiwa na mashaka kiasi fulani; hata wakati huu, bado alikuwa hajatambua Yesu kama Ndiye Kristo.

Soma Yohana 3:3- 21. Yesu alimwambia nini Nikodemo kuonesha kwamba aliweza kuona ndani yake moja kwa moja?

Yesu anajua moyo wa kila mtu. Mwitiko Wake kwa Nikodemo unaweza kuonekana kuwa wa ghafla, bali Yeye anaingia moja kwa moja kwenye suala husika. Ingawa Wayahudi waliamini ya kwamba iliwapasa Wamataifa waongoke, wengi hawakuelewa kwamba, wao pia, watu walioteuliwa, walihitaji uzoefu wa uongofu. Hakuna anayezaliwa akiwa ameokolewa, licha ya utaiifa au kanisa lao ambapo walikulia.

Bila shaka, urithi wa ajabu wa Wayahudi, ukirudi nyuma hadi kwa Ibrahimu, uliwapatia manufaa dhahiri kadha wa kadha (*tazama Rum. 3:1, 2*). Lakini huo katika kuwepo kwake wenyewe haukutosha. Bwana Yesu alimwambia Nikodemo ambacho hakukitarajia - kwamba yeye, mwalimu na kiongozi katika Israeli, sharti azaliwa upya kutoka juu!

Ndipo Yesu alipomkabili Nikodemo kwa ujinga wake wa kiroho: "Je! Wewe u mwalimu wa Israeli, na mambo haya huyafahamu?" (Yohana 3:10). Inawezekanaje, wewe mwalimu uliyetukuka, usijue hili? Lazima kemeo lilikuwa la kushtusha.

Licha ya maswali yoyote aliyokuwa nayo kumhusu Yesu wakati huo, Baada ya hapo Nikodemo akawa upande wa wafuasi wa Yesu (*tazama 19: 39*).

"Kuzaliwa upya" maana yake ni nini, tena kwa nini Bwana Yesu alisisitizia jambo hili kiasi hicho?

Jifunze Zaidi: Soma Ellen G. White, "Nikodemo," uk. 145 - 154, katika *Tumaini la Vizazi Vyote*.

Nikodemo "Alichunguza Maandiko kwa namna mpya, si kwa ajili ya kufanya mijadala ya kinadharia, bali ili apate uzima katika nafsi yake. Alianza kuuona ufalme wa mbinguni alipojisalimisha kwa uongozi wa Roho Mtakatifu...

"Tunapokea neema ya Mungu kwa imani, lakini imani si wokovu wetu. Haileti chochote. Ni mkono tu unaoweza kumshika Kristo, ambaye Ndiye dawa ya dhambi... Toba hutoka kwa Kristo, kama vile ilivyo msamaha wa dhambi.

"Kama vile ambavyo Musa aliinua nyoka jangwani,' ndivyo hivyo Mwana wa Adamu alivyoinuliwa, na kila mtu ambaye amedanganywa na kuumwa na nyoka anaweza kumtazama akaishi. "Tazama, Mwana-kondoo wa Mungu, aichukuaye dhambi ya ulimwengu!" Yohana 1:29. Nuru inayong'aa kutoka msalabani huufunua upendo wa Mungu. Upendo Wake hutuvuta Kwake. Tusipokaidi upendo huu tutaongozwa mpaka chini ya msalaba na kutubu dhambi zile zilizomsulubisha Mwokozi. Halafu Roho wa Mungu huleta uzima mpya kwa imani. Mawazo na shauku zinatiishwa kufuata Mapenzi ya Kristo. Moyo na nia huumbwa upya kwa mfano Wake atendaye kazi ndani yetu ambaye huvitiisha, vyote chini Yake. Halafu sheria ya Mungu huandikwa katika dhamiri zetu na roho zetu, nasi tunaweza kusema Pamoja na Kristo, kwamba: "Kuyafanya mapenzi yako, ee Mungu, ndiyo furaha yangu." Zaburi 40:8." - Ellen G. White, *Tumaini la Vizazi Vyote*, uk. 152 - 153.

Maswali ya Majadiliano:

1. Yohana Mbatizaji alikuja kuandaa njia kwa ajili ya Yesu. Je, kama ungeipima huduma yake ungesema imekuwa na mafanikio kiasi gani, angalau kulingana na mtazamo wa kibinadamu? Vilevile, unapofikiria jibu lako, uliza swali hili muhimu: Je, unafasilije "mafanikio" katika mambo ya kiroho?

2. Baadaye, Yohana Mbatizaji alitamka mashaka yake halisi (Mt. 11:2,3; Luka 7:19). Ni kitu gani kilichosababisha maswali haya na tunaweza kujifunza nini kutokana na hayo maswali kuhusu namna tuavyoweza kuwa na imani katika imani yetu?

3. Kwenye darasa, jadili wazo la namna ambavyo mtu kama vile Nikodemo, kiongozi kwenye kanisa la kweli, mtu ambaye kwa hakika alikuwa na ujuzi mwingi, awezavyo kuwa mjinga hivyo kiroho katika mambo ya msingi kabisa. Tunaweza kupata mafundisho gani kutokana na hali hii?